



Protocol

dalla seduta dil cussegl da vischnaunca,
venderdis, ils 15 da december 2017 allas 19.15 – 20.30
Liug: Casa Communala

Presidi: Christoph Berger

Actuar: Paul Duff

Presents:

- | | | |
|---------------------------|---|--|
| a) Cussegl | Armin Berther
Adrian Deflorin
Anna Maria Genelin
Wendelin Jacomet
Christian Loretz
Helga Probst-Linder | Stefan Columberg
Mario Flepp
Rita Huonder-Tenner
Admir Jasarevic
Armin Manetsch
Livio Zanetti |
| b) Suprastonza | Robert Cajacob
Victor Flepp
Iso Mazzetta | Clemens Berther
Jris Lombris |
| c) Canzlist | Andri Hendry | |
| d) Perstgisas
cussegl: | Edgar Durschei
Giusep Lozza | |
| e) Hosps | negins | |

Plaid d'avertura entras il president

Sontgaclau

Avon in'jamna ei il Sontgaclau vegnius. Grond engraziament a tut ils engaschai dalla messa da Sontgaclau che ha liug mintg'onn. Ils affons dalla scoletta han l'emprema gada viu il Sontgaclau cun dus vers asens, in eveniment fetg special, dad eveniments sco tal san ils affons els marcaus mo semiar.

L'Uniun da dunnas ha organisau la dumengia vargada il di da Sontgaclau pils seniors. Bunamein 100 personas han visitau l'occurrentza ed han gudiu la viseta dil Sontgaclau e schau gustar il furtem betler e la petta.

Autras occurrenz

La sonda ha giu liug la 33avla Disentiser-Kanne da curling, ina gronda concurrenza el Center da sport e cultura ch'ei vegnida organisada dil Club da curling Mustér.

Medel

Ina gronda sorpresa ei stada la novitad che la gronda part dalla suprastonza da Medel stat buca pli a disposiziun per ina proxima perioda d'uffeci.

Vein nus forsa schon en in onn ina vischnaunca Mustér-Medel/Lucmagn?

Forsa va lu la colligiaziun simbolica denter quellas vischnauncas, il project d'ina punt Sontga Gada – Mumpé Medel pli spert vinavon. En mintgacass vein nus da baghegiar ora la buna collaboraziun denter quellas duas vischnauncas.

Neiv e nova inspiraziun

La neiv ei vegnida ed empermetta ina buna entschatta dalla sesiun turistica d'unviern. Las lavurs da construcziun dil Resort Catrina e dallas pendicularas s'avonzan. Meinis dividi per ina collaboraziun vegnan sulet dils exponents politics dalla vischnaunca vischinonta. Nus sperein ch'il bambin detti ad els l'inspiraziun per ina pasch da buna convivenza.

Plaid final cun engraziament

Per mei eis ei sco sch'jeu vess grad entschiet quei onn presidial, en in pèr dis ei quel schon alla fin. Jeu less engraziar alla suprastonza ed als luvriers da vischnaunca per la buna collaboraziun. Jeu engraziel grondmein a tut quels che han susteniu mei durant quei onn presidial, en special agl actuar ed al vicepresident Armin Manetsch.

Communicaziuns

Mortori:

Balzer Deflorin-Loretz, naschius ils 26 da zercladur 1931, morts ils 13 da december 2017



Cussegl da vischnaunca 2017/2020

Protocol no. 9

Seduta dils 15 da december 2017

Tractandas:

1. Protocol 8-2017/2020
2. Baghetg pil santeri e stabiliment per la rimnada da rufids: Damonda da credit (messadi nr. 13-2017/2020)
3. Agenda 2018
4. Ura da damondas (conform ad art. 44 dil regulativ da fatschentas)
5. Elecziuns:
 - 5.1 dil president ni dalla presidenta dil cussegl da vischnaunca per 2018
 - 5.2 dil vicepresidente ni dalla vicepresidente dil cussegl da vischnaunca per 2018
 - 5.3 digl actuar dil cussegl da vischnaunca per 2018 - 2020

Cussegl da vischnaunca Disentis/Mustér
Il president: Igl actuar:

Christoph Berger

Paul Duff



Cussegl da vischnaunca 2017/2020

Protocol no. 9

Seduta dils 15 da december 2017

1. Protocol

Protocol nr. 8-2017/2020

Il protocol ei vegnius tarmess tier per posiziun. Enteifer ils tschun dis fixai ei vegniu inoltrau neginas objecziuns.

Discussiun:

Cussegl:

Per survegnir ina meglia survesta dalla tractaziun dil preventiv fuss giavischeivel d'indicar l'appartenientscha dil discurreu allas spartas da contabilitad «quen da gudogn e sperdita, quen d'investiziun, controlla da credits ».

Decisiun:

*Il protocol vegn **approbaus** cun far las **midadas proponidas**.*

Cussegl da vischnaunca Disentis/Mustér
Il president: Igl actuar:

Christoph Berger

Paul Duff



2. Baghetg pil santeri e stabiliment per la rimnada da rufids: Damonda da credit (messadi nr. 13-2017/2020)

Presentaziun:

Suprastonza:

Gerau Victor Flepp: Cun igl acquist dalla parcella entras la societad da baghegiar Sut Gliendas igl onn 2015 ei il baghetg da santeri existent vegnius spazzaus. Il baghetg projectaus survescha per dismetter ils rufids da santeri e supplementarmein vegnan dus molocs postai dasperas. La Regiun Surselva promova l'installaziun da molocs. Quels sminueschan ils cuosts dalla dismessa da rumien. Il baghetg da betun ei el concept dils ulteriurs baghetgs dalla vischnaunca. Ils cuosts dil baghetg ein calculai cun frs. 90'000.--, ils molocs cun frs. 25'000.-- ed ils cuosts accessoris cun frs. 20'000.--.

Discussiun:

Cussegl:

Il baghetg en betun sco las tualettas a Davos-Mustér ein bein veseivels sin tuts mauns e plai buc. Ei el postaus el dretg liug? Dat ei variantas che prendessen buca naven parcadis? Nua savess ins postar ina secunda varianta dil baghetg?

Gerau Victor Flepp:

Igl avantatg d'in baghetg en betun ei ch'ei dat pauc manteniment. Sche quel plai ni buc ei ina caussa da detagl. In auter liug fuss staus el cantun santeri. Mo ord ponderaziun da pietad, lu era per igl access dil camiun da cargar il rumien ei quel buca vegnius risguardaus. Che treis parcadis van sut cul baghetg niev ei in disavantatg.

Cussegl:

Ei dat uss molocs a Davos-Mustér, a Carcarola ed ussa avon il santeri. Fuss ei buc d'avantatg da remplazzar las suschnas existentas cun molocs? Per far quei drova ei in concept sur il territori da vischnaunca ora. Ord tala ponderaziun ston ins prender ils cuosts dils dus molocs ord il project 13-2017/2020.

Gerau Victor Flepp:

Igl onn 2015 ei vegniu fatg in'analisa per installar molocs en vischnaunca. La realisaziun duess succeder tochen 2020. In project persuenter vegn a succeder. Ils loghens da postar novs molocs vegnan defini dalla Regiun Surselva. Ils molocs cuostan frs. 5'000.-- l'in. El preventiv 2018 ei previu in'expensa da frs. 15'000.-- sut il conto 7301.3111.00. Ils dus molocs projectai van 2 meters sut tiara.

Gerau Iso Mazzetta:

Il project presentau duess buca vegnir tratgs dapart. Igl ei denton pusseivel da contar ils cuosts da baghegiar dils molocs cul contuorn sil conto «rumians».

Cussegl:

Sche l'idea dils molocs vegn schon realisada proximamein, fa ei senn da baghegiar quels cul stabiliment santeri. Nus duessen pia baghegiar quels tenor proposta dil project.

Il liug dil niev object savess ins posiziunar auter per buca piarder parcadis. Dat ei surpli cuosts pervia dil tunnel dalla MGB? Ston ins cavar fundament tochen giu sil tunnel e caschuna quei buca donns vid quel?

Gerai Victor Flepp:

Nus havein la lubientscha dalla viafier MGB. Tenor sclariment dat ei buca problems cun la statica. Nus vegnin ad orientar els sur dil stan da baghgiar dil project. Igl ei era buca previu cuosts supplementars en connex cun baghegiar sur il tunnel.

Gerai Iso Mazzetta:

La construcziun dil baghetg e dils molocs ei aschia ch'ins sto buca cavar profund. La posiziun dallas entradas el baghetg ein dalla vart en per buca disturbar igl ambient dil santeri.

Decisiun:

Il cussegl accepta **senza cuntervuschs ed abstenziuns** il project «Baghetg pil santeri e stabiliment per la rimnada da rufids» e **conceda per la realisaziun da quel in credit da frs. 135'000.--**.

Cussegl da vischnaunca Disentis/Mustér
Il president: Igl actuar:

Christoph Berger

Paul Duff



3. Agenda 2018

Cussegl:

President Christoph Berger presenta l'agenda dallas sedutas dil cussegl per igl onn 2018:

- | | |
|---|---|
| 1. Venderdis, ils 23 da fevrer 2018 | |
| 2. Venderdis, ils 23 da mars 2018 | |
| 3. Venderdis, ils 20 d'avrel 2018 | <i>Quen 2017</i> |
| 4. Venderdis, ils 8 da zercladur 2018 | <i>Program d'activitad e plan da finanzas</i> |
| 5. Venderdis, ils 24 d'uost 2018 | <i>Seduta extra muros</i> |
| 6. Venderdis, ils 14 da settember 2018 | |
| 7. Venderdis, ils 5 d'october 2018 | |
| 8. Gievgia, ils 15 da november 2018 | <i>Preventiv 2019</i> |
| Venderdis, ils 16 da november 2018 | <i>Termin da reserva</i> |
| 9. Venderdis, ils 14 da december 2018 | <i>Seduta finala</i> |

Decisiun:

*Il cussegl accepta l'agenda 2018 **senza cuntervuschs ed abstenziuns.***

Cussegl da vischnaunca Disentis/Mustér
Il president: Igl actuar:

Christoph Berger

Paul Duff



Cussegl da vischnaunca 2017/2020

Protocol no. 9

Seduta dils 15 da decembre 2017

4. Ura da damondas (conform ad art. 44 dil regulativ da fatschentas)

Suprastonza:

President communal Robert Cajacob:

La damonda da cusseglier Adrian Deflorin pertucca taxas turisticas. Sco possessurs da secundas habitaziuns valan era las tegias da mises. Quellas pagan oz frs. 100.-- annualmein sco taxa turistica. La vischnaunca impunda 10% dallas entradas da taglia, netto frs. 368'000.-- per il turissem. Nus essan obligai da tschentar quen als possessurs da secundas habitaziuns e tegias da mises. Ei basegna denton in'expertisa che definescha nua e co che quella summa vegn investada.

Gerau Clemens Berther:

Cussegliera Helga Probst ha fatg ina damonda appartenent il problem da «Neospora». La risposta sto spitgar, pertgei che la regenza dil cantun ed igl uffeci veterinar han aunc buca tractau la damonda. Quei vegn ad ir aunc treis meins avon il tractament. Per nus setschenta la damonda, schebein la vischnaunca sto reagir cun intervenziuns en causa «Neospora». Pil mument hai num da spitgar.

La damonda alla regenza ei buca definida encunter tgauns. La risposta vegn a sclarir la causa.

Cussegliera Helga Probst :

L'informaziun ei buca clara. Per mei vai che buca ils tgauns ein pertuccai da derasar la «Neospora».

Gerau Iso Mazzetta :

Il postulat da cusseglier Wendelin Jacomet sa buca vegnir presentaus el decuors previus el regulativ da fatschentas. Il proxim cussegl ha liug il fevver 2018 ed il termin survarga in pèr dis.

Cussegl da vischnaunca Disentis/Mustér
Il president: Igl actuar:

Christoph Berger

Paul Duff



5. Elecziuns

5.1. Dil president ni dalla presidenta dil cussegl da vischnaunca per 2018

Cusseglia Mario Flepp:

Pertgei ei buca vegniu fatg egl entir cussegl da vischnaunca la consultaziun per proposta sin ina persuna per il presidi da 2018? Sco noviz havess el spitgau dad era esser orientaus e saver far las ponderaziuns en caussa. Ei va ad el buca encunter las personas proponidas, mobein sulettamein per la moda e maniera che quellas propostas vegnan ussa fatgas senza che tuts cussegliers ein integrai el discuors.

President dil cussegl Christoph Berger propona sco president dil cussegl da vischnaunca per igl onn 2018 cusseglier Armin Manetsch.

L'elecziun ei fatga cun scrutini.

Decisiun:

Cedels reparti	13
Cedels returnai	13
Cedels vits e nunvaleivels	4
Cedels valeivels	9
Absolut pli	5

Cun 9 vuschs ei cusseglier Armin Manetsch eligius sco president dil cussegl da vischnaunca per 2018.

Plaid dil nieveligiu president dil cussegl da vischnaunca:

Cun grond plascher prendel encunter ed acceptel mia elecziun sco president dil cussegl da vischnaunca e sesprovel d'ademplier quella sfida cun miu meglier saver ed engraziell per vossa confidanza.

Lubi a mi entgins patratgs per Mustér sut il motto «agir e buca reagir». Sche nus mirein tgei che vegn investau e baghegiu el sectur turistic, denton buca mo leu, jeu patratgel era vid lavurs da construcziun bassa egl avegnir en connex cun la meglieraziun funsila, vias funsilas ed era vias forestalas. Mo adina essan nus in pass pli plauns ch'ils biars auters. Nus essan stedi vid «reagir enstagl dad agir».

Essan nus per exempel tier il CSC sin la dretga via ni essan nus schon puspei mo vid reagir enstagl agir? Duvrein nus forsa dapli curascha, dar si ina caussa ni l'autra sto buca adina esser ina sperdita, mobein sa esser in gudogn e dar plaz per enzatgei niev ed innovativ. Havein nus forsa schizun tonta curascha da spazzar ina gronda part dil CSC per allura saver agir pil futur e buca mo reagir?

Ei nies patertgar magari buca memia a cuorta vesta? Sco instructor da pumpiers scolein nus adina puspei ils pumpiers da patertgar lunsch ordavon tgei che savess aunc schabegiar ed aschia empruar dad esser in pass ordavon al schabetg.

Stat il hosp a nus adina ella duida posiziun ni mirein nus mintgatun tuttina in tec fetg mo sin nos agens interess? Secapescha valan nos interess era enzatgei, mo nus essan tuttina in liug turistic e quei buca mo igl unviern e buca mo da bialaura, mobein da tut temps. Sesenta il hosp bein ed ei la purschida buna tier nus, sesentin era nus bein cheu.

Famiglias, ch'ei ina gronda part da nos hosps, ein forsa buca quels tals che han massa raps. Na, aunc bia meglier, els portan a nus nos hosps e forsa era nos habitonts pil futur. Lein nus hosps d'aula qualidad, lu stuein nus era porscher ina purschida d'aula qualidad.

Cun grond plascher legel adina puspei co giuvens pèrs e famiglias ughegian da baghegiar lur dacasa e fundeschan ina famiglia en nossa vischnaunca. Fagein nus tut pusseivel per porscher ad indigens, hosps, giuvens e vegls cundiziuns da rama attractivas per star e per vegnir ni era turnar a Mustér? Tractein nus tuts tuttina, investurs, hosps ed indigens, ni vendin nus per raps magari perfin noss'olma e schein dictar tgei che nus havein da far? La pli grond'investiziun porta a Mustér nuot sch'il hosp vegn buc ni tuorna buca pli. Haveien nus pia bien quita era da nos sempels e giuvens hosps.

Sin tut mes patratgs e mias damondas sa, supponel jeu, negin dar ina risposta. Ina ni l'autra caussa serispundan forsa da sesez el decuors d'in auter onn. Mo ei duei tuttina far patertgar nus tuts, tgei che mintgin da nus sa far persuerter.

Far sbagls ei buca ina fleivlezia. Nus tuts fagein magari sbagls. La gronda fermezia ei da buca far duas gadas il medem sbagl ed emprender enzatgei ord quels. Aunc inagada, nus lein, ni meglier detg, nus stuein egl avegnir «agir e buca reagir».

Ussa lessel aunc engraziar a tut tgi che stat adina davos mei. En special mia famiglia che ha gronda capientscha per tut quei. Era lessel engraziar grondamein a nies president dil cussegl da vischnaunca Christoph Berger per tut sia lavur. Engraziel fetg!

5.2. Dil vicepresidente ni vicepresidenta dil cussegl da vischnaunca per igl onn 2018.

Cusseglia Livio Zanetti propona cusseglier Armin Berther per vicepresidente dil cussegl da vischnaunca per igl onn 2018.

L'elecziun ei fatga per scrutini.

Decisiun:

Cedels reparti	13
Cedels returnai	13
Cedels vits e nunvaleivels	3
Cedels valeivels	10
Absolut pli	6

Cun 10 vuschs ei cusseglier Armin Berther eligius sco vicepresidente dil cussegl da vischnaunca per 2018.

Cusseglia Armin Berther declara d'acceptar l'elecziun.

Cusseglia Armin Berther aveva la funcziun da suppleant da dumbravuschs. En consequenza da sia elecziun sco vicepresidente dil cussegl da vischnaunca sto quei post vegnir reparti da niev.

Cusseglia Christian Loretz vegn proponius sco sulet sco suppleant da dumbravuschs.

Decisiun:

Il cussegl elegia cusseglier Christian Loretz sco suppleant da dumbravuschs cun 12 vuschs ed 1 abstenziun.

5.3. Digl actuar dil cussegl da vischnaunca per 2018-2020.

Proponius ei Paul Duff sco actuar dil cussegl da vischnaunca per 2018-2020.

Decisiun:

Il cussegl elegia Paul Duff sco actuar dil cussegl da vischnaunca per 2018-2020 cun 13 vuschs e senza abstenziun.

Cussegl da vischnaunca Disentis/Mustér
Il president: Igl actuar:

Christoph Berger

Paul Duff

Engraziament:

President communal Robert Cajacob:

Engrazia als cusseglers e cusseglieras da vischnaunca sco era als consuprastonts ed al canzlist per la collaboraziun e per lur lavur duront igl onn 2017.

President dil cussegl da vischnaunca Christoph Berger:

Engrazia per la buna entelgientscha alla suprastanza communal ed al canzlist sco era als concusseglers e concusseglieras. El envida ils presents alla tscheina da ventschidas che vegn survida dils ustiers dalla Stiva Grischuna.

Disentis/Mustér, ils 27 da december 2017